

## **Nzryrkr Pita Krali** **Natq Ngr Nzaplxtqngr Mz** **Nzryrkr Pita Krali**

Aposol Pita yrle letz lc mz mzlir yiz 65—67 AD mz nibr nzrmcngr mz Jiszs, mzli kc tqmnc-ngrde Rom. Mwx ryrbz mz leplz kcng pwz tqyrbzle letz kc kai badr. Pita krlzle kx ycpe pipz nzbz-krde, x suti drtwrde kx nakrlzlr kx kxnzavztr-rbrng nzprtrpebzng mz lrmakxtr x nzatrkatipelr nzrlxngitigr leplz. Pibzle badr kxnamu nzglx-krdr leplz lcng x mz natqde kxpq rngidrlvz-ngrbzle badr kx leplz kxnzmulr lcng sa naptrrng mz Hxl. Kxmule-esz' leplz lcng nzpibqtilr nzavztrkr aposol, a' nzavztrkr aposol amrlx da angidrtx. X nzmncr leplz neng Gct natubq x natr mz nzaenzli-krdr nzatutr-krde nzesalz-krde mz nyzylu-krm Jiszs.

<sup>1</sup> Ninge Saemon Pita, wztrpo mz Jiszs Kxnzm-cpx x ni-kzpc' aposol nede. Ryrbo bamu, nimu kcng tztwzlr nzrlxngitingr kcpwz tqka-kzp Gct bagr, mz nzngini-krgr aposol. Murde nzrlxngit-ingr lc tutr mz nztubqkr Jiszs Kxnzmcp x kc tqngi Gct x Mevalu rgu.

<sup>2</sup> Krka'-ngrne kx naokatr zvz Gct nimu mz zmrlz ngrde kxmyalz x namnc-zpwxamu mz nzkrly-angidr-krmu nidr ncdr Kxetu rgu Jiszs.

*Nzmnc-krmu Natubq*

<sup>3</sup> Gct kapemle bagu da amrlx kcnq tqsuti drtwrgu mz nzmncngr kxtubq. Murde krlzku nzprtr-krqu mz zmatq ngr Kraes mz nzkrly-angidr-krqu nide murde nzaxvctrpebzku bade. X nzqlekr Kraes nigu mz nzngini-krqu leplz nedeng vzpxm mz nzmyalz-esz'ngr-krde x nzmrlz-esz'ngr-krde.

<sup>4</sup> X da kx prpxm mz nqmq krde lcnq tqmrlz-esz'ngr, nzesalz-krmle bagu da kxmrlzting kxmyapxbz mz Nzryrngrkxtr. X mz nzbrtikr drtwrmu natqde lcnq, sa narlapxamu mz nzbzngr kc tqvzpxm mz zmatq ngr drtwr kxtrka kcnq tqrmcti-zvzamu mz nzmnc-krmu mz nrlc ka. X nzmnc-krmu sa natubq x natr, da kc tqwai Gct, mz nzprtr-krmu mz nzmrlzkr nqmq krde.

<sup>5</sup> Mz nzm-krde lcde, nzapu-krmu Gct naetunepx vz. X mz nzbrtikr drtwrmu lc nide, nqmq krmu namrlz. X mz nzmrlzkr nqmq krmu lc, nakrlz-angidramu nide.

<sup>6</sup> X mz nzkrly-krmu lc nide, na-aclvetio-lzbqamu, murde ma tqaleamu alwx. X mz nzaclvetio-lzbq-krmu lc, natu-amqngi-zvzamu kxmule-esz' da kx prtz. X mz nztu-amqngi-krmu lc, navz-nqblq-zvzamu me pnz drtwr Gct.

<sup>7</sup> X mz nzvz-nqblq-zvz-krmu lc nide, namrlzti-amu kztemung kcnq tzrlxngiting. X mz nzmrlzti-krmu lc nidr, na-aodu-zvz-kzamu leplz amrlx.

<sup>8</sup> Murde nzmnc-nqblq-krmu nqmq lcnq sa naokatrle nimu mz nzkrly-angidr-krmu Kxetu rgu Jiszs Kxnmcpx x nzlu-krmu trnamaneu, a' nrade sa nays-zvzbz.

<sup>9</sup> A' doa kx trmnc-nqblqleu nqmq lcnq, apule ncblo kx mzte mwi o kx mzte kamrbrngr. Murde

mrbtrpe mz drtwrde kx Gct ycpqpxpebzle alwx ngrdeng. X trkrlzleu drtwr ngr nznngini-krde doa ne Gct.

<sup>10</sup> Mz nzm-krde lcde, kx mzlengeng x inwengeng, navqti drtqmu mz nzmnc-nqblq-zvz-krmu nqm q lcng mz nzaelwapx-krmu kx prtr-angidrbzmu mz leplz kcng tqkqleng Gct x tqm-cpxleng. Murde mz nzale-krmu da lcng, trtx-pnzng nzyrlqpx-lzbq-krmu mz nzrlxngitingr.

<sup>11</sup> X Gct sa na-abrtzlvz-zlwzle nimu, mz nzprtr-krmu mz nzlungr kxboi Heven, mrkc tqaclve Kxetu Mevalu rgu Jiszs Kxnmcpx mz nznngini-krde King. \*

<sup>12</sup> Kxmule-esz' krlzpeamu x lolvz-amqngipe-kzamu da amrlx lcng tzalvztr-ngrmu, a' sa navz zvz mz nzadcpx-krboleng mz drtwrmu, murde nayc zvz.

<sup>13-14</sup> Murde Kxetu rgu Jiszs Kxnmcpx aopx-angidrmle bange kx nzmnc-krnge mz nrlc ycpe pipz nzyrkrpx-krde. Delc, mrlzvxitx nzpi-mou-krboleng bamu, mzli ka tqlube-ngrne mz nrkr-drtqng, kc tqapule matelq nyznge mz nzmnc-krnge mz nrlc.

<sup>15</sup> Mz nzm-krde lcde, sa nayapwx-dalitipxbo da lcng bamu, murde ma tqmrbtr mz drtwrmu mz nibr nzbz-krnge.

### *Nzryrngkxtr X Nzalvztrkr Aposol Takitrde Nzbrtikr Drtwr Leplz Leng*

---

\* **1:11** A' leplz kcng trnzvz-nqblqru nqm q lcng, trnznginidru leplz angidr neng Gct. X trnaptrung kalr Heven.

16 Mzli kc nigr aposol tqpi-ngrbzkzr bamu zmatq ngr Kxetu rgu Jiszs Kxnzmcpz mz nzmnc-krde mz nrlc ka x nyzylu-mou-krmlc kalr, trvz-nqblqkru nzryapwxtxnengr. A' pi-txpwzkr da kx mc-angidrkr mz mzkr x da kx xlrkr, myapxbz mzli kc nigr mz Jemes x Jon tqmc-ngrgr nzmialz-esz'ngrkr Kxnzmcpz.

17-18 Murde mzli lcde mncomgr badr mz newz kxtr, obqbkzr nrkrdrtdc tekqtr-lzbqpe mz zluli. X xlrkr rtqlrgr natq Gct kx matq-esz'ngr vzom Heven. X Gct Trte amatqle x armialzle nide mz nzrpi-krde kx, "Mrlx lc nide mrlxnge Kxnzmrlzti. X abrtzlvz-zlwzx nide." ✨

19 X krlc aelwapx-ngrmlc bagu kx nrpa ngr profet mz Nzryrngrkxtr da angidrtr. Mz nzm-krde lcde, mrlzvxix nzaotikr drtwrmu natqdrng. Murde natqdr nzapulr zyzlr kx napnamilxtile lrpzki mz nrlckxbq mz nzaelwapx-krmlc bagu nzti rgu. X nalxngitiamu Nzryrngrkxtr lcng vz-krlzbzle mzli kc nayzlu-ngrm Kraes mz nzbatr-krbzle bamu nzklz-atwrnr-krmu Gct. Mz nqm q lcpwz kc paglxnrlc tqngi rkx ngr nzabzokr zbq kxmrna, nzvz-krm Jiszs sa nangi kz rkx kx Gct sa tqamrnale x tqatubqtile nrlc.

20 Nakrlz-angidramu kx trpnzngr nzrplzpxkr profet kcng tqyclzm mz Nzryrngrkxtr kx vzdzm mz drtwr profet esz'-krde.

21 Murde trpnzngr nzrplzpxngr angidr kx vzpxm mz ncblo esz'-krde. A' Mqngkxtr batrpzle badr nzplzpx-angidr-krdr natq Gct.

---

✨ **1:17-18** Nou 22:2; Sam 2:7; Asaea 42:1; Matiu 17:1-9; Mak 9:2-9; Luk 9:28-36

## *Kxnzalvztr Kxnzpokiang*

### 2

<sup>1</sup> Mzli kc bqnc, profet kxnzpokiang kxkqlu nzmncpxmqng mz mzliir lr Israel. X mz nqm̄q lcdepwz, kxnzalvztr-rbrng sa naprtz-kzpqng mz mzliirmu. X sa na-alvztr-rbr-ngrdr nimu da kx na-atrka-atwrnr-ngrde nzrlxngiti-krmu. X sa naesablqti-kzlr Kxetu Jiszs kc tqxpepxle nidr. X mz da kxtrka lcng tzaletilr, sa naodati ani Gct nidr.

<sup>2</sup> X kxnzrlxngiting kxnzqqlung sa navz-nqblqlr nidr mz nzale-krdr da kx myangr drtq. X leplz sa napibqtilr nqm̄q kr Kraes mz nzmc-krdr nqm̄q lc tqtrka tzvz-nqblq leplz nedeng.

<sup>3</sup> Kxnzalvztr-rbr lcng nzrkcmnz-ngrng x sa naesabrtilr nimu mz natqdr mz nzrtwz-krdr trau scmung x dtzumung. A' Gct yrlq-pnzle drtwr mzli kc bqnc kx sa na-ayrplapxle leplz kxnmulr lcng.

<sup>4</sup> X aelwapx-ngrmle da lc bagu mz nzayrplapx-krde kxnvz-rbrng mzli kc. Murde tryrlqtxpxleu mz nzayrplapx-krde enjrl kcng tztaong mz alwx. A' rtco-ngrde nidr mz Hxl mz gq kx vzo la x tungr nzlo. X namncng elr nakrlzbzle mzli kc nayzlu-ngrm Jiszs.

<sup>5</sup> X tryrlqtxpx-kzleu mz nzayrplapx-krde leplz kxdrka'-ngrng amrlx mz mzli nyz Noa. A' atwzlr-ngrbzle nubla mz nrlc atwrnrngr kc tqodatile leplz amrlx, a' arlapxpwxle Noa nidr badr doa lr ma nyzde nzrlimzng. Murde Noa yapwxtipx-zvzbzle badr kx nqm̄q krdr natubq.

<sup>6</sup> X Gct ayrplapx-kzle leplz ngr taon kcng li, Sodom x Gomora, mz nzangc-atwrnr-krde nidr x taon nyzdrng, x trpnzng r mou kxlu, a' bq ngrdr kx yc txpwz. Krlc me nakrlztingr kxnamu nzayrplapx-krde leplz kcng tzale-zvzng alwx kalr. ☆

<sup>7</sup> A' Gct arlapxle Lot mzli lcde, murde nide ncblo kxtubq kc tqxngitr-zlwzle nzale-zvzkr leplz lcng drka'-ngrng da kx myangr drtq. ☆

<sup>8</sup> X nabzde talvzo zlwz mz z bq kang kqlu tqmnc-ngrbzle mz mz lirdr. Murde mcle x xlrle nzxpqbrlr-zvz-krdr lou scng Gct.

<sup>9</sup> Krlcng nzaelwapx-ngrdr kx Gct krlzle nzarlapx-krde leplz nedeng kxnztubqng mz nzetqkr drtqdr. X krlz-kzle nzlolvz-amqngi-krde leplz kxdrka'-ngrng mz nzamnclz-krbzle nidr mz zmatq ngr nzayrplapx-krde nidr, vz-krlzlezle mzli kc nayzlu-ngrm Jiszsz mz nzayrplapx-zpwx-krdeleng.

<sup>10</sup> X sa na-ayrplapx-zlwzle leplz kcng tzaleng da kx myangr drtq x kxnzobqszolr zmatq ngrde. Da kc tqwai-kzpzele mz kxnzalvztr-rbrng. Murde trnzavzo-lzbqung, a' nzglqpx-lzbqng x trnzmwxlr nzpibqti-krdr enjrl neng Gct.

<sup>11</sup> X kxmule-esz' enjrl lcng tzmatqng nzmyaszpxlr leplz lcng mz zmatq x nzxpnrng, a' trnzpibqtilru leplz lcng mz nzrpi-krbzlr mz Gct kx nzvz-rbrng.

<sup>12</sup> A' kxnzalvztr-rbr lcng nzpibqtilr da kznikeng tryrplatitru nardr. Murde nzapulr animol kzpetong kx trpnzng nardr x nzvz-nqblq-tpwzlr nike nznxngibz nrkrdrtdr. X sa naodat-

ing mz nzapu-krdr poi kzpetong, kx takitxtrpwzle nzrlolvzng r nanibqng.

<sup>13</sup> Nzodatingr lc nidr ngi dalr nzayzlu-ngrbz badr nzatrkatikrdr nzrlxngitikir leplz. Nzabrtzlvz-zlwzlr nzvz-nqblq-krdr drtwr kxtrka kx mrlzbz mz nrkrdrdqdr, kxmule-esz' nzmclr leplz. X mz nzmulvz-krmu badr da kx myangr drtq keng tzalelr, amyabzle drtqmu, a' trmyan-gru drtdqr.

<sup>14</sup> Mzli kang kqlu nzsuti zvz drtwrdr nzttrngzkrbzlr olvz, x drtwrdr trkrlzleu nzesapx-krdr. Nzmailztilr krkeng nzrlxngitikirdr tqngrgo mz lrpzki r alwx. X nzkrz-angidrlr nztrkibrngr. Alwx lcng amrlx nzamnczbzlr nidr mz nztprlzkr Gct.

<sup>15</sup> Mrlx lcng tzmnc-mrbrng nzrlaszpelr lrpzki angidr x nzvz-lukurnrpe-ngrng, mz nzo-zli-krdr lrpzki kc tqo-zli Balam, mrlx Beo mzli kc bqnc. Mrlz-zlwzbz mz Balam nzatatr-krmle trau mz nzalengr da kxtrka.

<sup>16</sup> A' mzli kc dcngki nede tqpnanati-ngrde nide mz nzymnekr ncblo, batrpzle bade nzesakikr nzngqngu-krde. ✧

<sup>17</sup> Kxnzalvztr-rbr lcng nzapulr lrpao kxpz, x nzapu-kzlr dcbz kxmingr kx twzne nenq, murde da kx nzalvztr-ngrdr trokatrleu leplz. Gct oliqtipele mr nyzdr me tungr nzlo, mz nzayrplapx-krde nidr mz Hxl.

<sup>18</sup> Leplz lcng nzglqpx-lzbq-zvzng mz nzymnekrdr kx trpnzng noude. X nztamitilr leplz kxnzrlxngiti-ateng mz nzamqmiti-rbr-krdr mz

---

✧ **2:16** Nzqqlu-krdr 22:4-35

nrkrdrtdr. Murde leplz lcng tzrlxngiti-ateng, tr-rblxu nzataongr nidr mz alwx.

<sup>19</sup> Kxmule-esz' nzipixbzlr mz leplz kx drtdr na-aopxng mz nzale-krdr da kx suti drtwrdr, x trpnzng kx na-ayrplapxle nidr, a' kxnzalvztr-rbr lcng esz'-krdr drtdr tropxu, murde nzm-nclzbzng mz zmatq ngr alwx. Murde leplz amrlx kxrlr-lzbq-zvzbzng mz da, nzmnczbzng mz zmatq ngr da lcde.

<sup>20</sup> Mzli kc leplz tzabrtr-ngrbzlr drtwrdr mz Jiszs Kxnmcpx mz nzngini-krde Kxetu x Mevalu rdr, arlapxle nidr mz nqmq ngr alwx kc tqa-trkatile leplz. A' leplz kcng tzlxngiti-kailr Jiszs x mz nibrde nzesablqtilr nide mz nzprtr-mou-krdr mz alwx x mz nzmncz-krbzlr mz zmatq ngr alwx, nzmnc-krdr lc tqtrka sa namyaszpxle krkc kai mzli kc trnzlxngitika-ngrdr Jiszs.

<sup>21</sup> Murde leplz kcng tzlxngiti-kailr kxmu nz-tubqngr mz nzobqkr Gct x mz nibrde nzpctxpx-ngrdr natqde kc tzaprcbz badr, nzayrplapxkr Gct nidr sa namyaszpx-zlwzle nzayrplapx-krde kxtrnzrlxngitiung. ✧

<sup>22</sup> Natq ngr nzyrplapxng nzing nzymnetr-ngrdr nqmq krdr mz nzrpi-krdr kx, “Kuli yzlutile zngqba ngrde x ngq-moule.” ✧ X mou, “Poi mz nibr nzkipo-krde rtxo-lzbq-moungr mz dxlrbi.”

*Naoliqti-zvzamu Mzli Kc Nayzlu-ngrm Kxetu*

### 3

<sup>1</sup> Mzlengeng x inwengeng, mz letz lcng li tqyrbo bamu, tqadcp-mopwo kzdung da kx

✧ 2:21 Hibru 10:26-27 ✧ 2:22 Nzyrplapxng 26:11



krlz-angidrpeamu, murde nzaotikr drtwrmu leng natubq.

<sup>2</sup> Murde suti drtwrnge nzdcpx-krpwz mz drtwrmu natq kcng tzplzpxlr profet kcng bqnc. X nadcpz kz mz drtwrmu natq Kxetu x Mevalu rgu, kcng tqaprcbzkzr bamu, nigr aposol.

<sup>3</sup> Nakrlz-angidramu kx mzli ka tqaenzli-nrgu nyzylu-krm Kxetu, leplz kxnzxrnga-ngrdr da nzmncpeng mz mzlirgu mz nzyrpalelvzti-krdr nyzylu-krmle. Leplz lcng sa navz-nqblqlr drtwr kcng tqmrlzbz badr.

<sup>4</sup> X sa narpibzlr bamu kx, “?Jiszs rpile nayzlu-mop? ?A' myxpe nide? Trtegung nzbzpeng, a' trvzkap. Abzo mzli kc twwzngz nrlc krlzmlc mzli ka, trgalr da kx blepxngr.”

<sup>5</sup> A' leplz lcng mrbrtr mz drtwrdr da kc tqprtzc mzli kc bqnc. Murde mzli lcde Gct tqycmnetx-ngrpwzle x bongavz ncdz nrlc sc tzycpeng. X mz natqde wznedz-ngrmlc drtc' me boongz prla, murde prla nayc-ngale-ngrde drtc'. ✧

<sup>6</sup> X mz nibrde mz mzli nyz Noa, Gct odati-moule nrlc mz nzyrlekr nubla kxetu.

<sup>7</sup> X natq Gct kcpwz delc tqngi zmatq kc tqlolvz-zvzle nrlc x bongavz mzli ka. X sc tqvz zvz nzlolvz-amqngi-krdeng nakrlzbzle mzli kc nangc-atwrnr-ngrdr mz nyr, nidr badr leplz kcng tztrkang, mz nzayrplapxkr Gct nidr.

<sup>8</sup> Mzlngeng x inwengeng, bzkq mrbrtr mz drtwrmu Nzryrngrkxtr kc tqrpilc kx, “*Kxetu, mz drtwrgz, yiz kx siu (1,000) mz nrlc ngi mzli kxboi,*

---

✧ 3:5 Sam 24:2; 136:6

*a' mz drtwrm mzli mrbcnepwz, apunede zbq kx esz' kx yrkrpxpe."* ☆

<sup>9</sup> Krlc drtwr ngrde kx kxmule-esz' kzdung leplz nzrpilr kx asa zlwz, a' Kxetu Jiszs trasau mz nżangidati-krde natqde kx sa nayzlu-mop. Murde aenzli-zpwxle nżtekqtrkr leplz nqmą ngr drtwrdr mz nżarlapx-krde nidr. X suti drtwrde nżarlapx-krde leplz amrlx, x trpnzngr doa kxesz' kx namncpx. \*

<sup>10</sup> A' sa naodati-atwrnr-ngrde nrlc mz nżyzlu-krmle mz Mzli Kxmatq lc. X leplz sa napwrkilvc-ngrdrle mz nżapu-krde nżvz-krm kx pna da. ☆ Mz mzli lcde, bongavz x dalr bongavz amrlx sa naodati-kzng mz nyr kx nżulrde rbq x nżmqmqkr natqde naetu-esz'ngr.

<sup>11-12</sup> Mz nżaotikr drtwrmu nżodatingr lc, naoti kz drtwrmu nżmnc-krmu. Murde mzli ka tgaenzli-ngramu nżkaputr-krm mzli lc, suti drtwr Gct kx nżmnc-krmu natr mz nżvz-nqblq-krmu me pnz drtwrde. Murde mz nżayrkrpx-krmu nżwz-krde mz nrlc, sa nabatr-pzle nżkaputr-ani-krm mzli lc, mzli kc bongavz

---

☆ **3:8** Sam 90:4      \* **3:9** Kzdung leplz nzrpilr kx mzli kc nayzlu-ngrm Jiszs sa navz-nqblqle zbq kcng rlimz mzli kc Gct tqwz-ngrde nrlc. Mz drtwrdr, yiz siu esz' apule zbq kxetu kxesz'. X abzo mzli kc tqwzngr Gct nrlc krlzbzle nżyzlu-krm Jiszs sa nangi zbq kxetu kcng esz'mz, krlcde yiz siu esz'mz. X zbq kxetu krarlimz drtwr ngrde nżaclvekr Jiszs nrlc ka mz yiz siu esz', kc tzpi kz mz Nżaelwapxngr dckrlzde kc 20. Zbq kxetu lc apule zbq krarlimz kc tqamangr Gct mz nibr nżrwz-krde nrlc. Nżmu drtwr lc natubqle, yiz lcng siu esz'mz ycpe pipz nżyrkrpx-krdr x Jiszs sa nayzlupem. A' trpnzngr kx rkrlz mzli lcde.      ☆ **3:10** Matiu 24:43; Luk 12:39; 1 Tesalonika 5:2; Nżaelwapxngr 3:3; 16:15

nangc-atwrnr-ngrde x dalrdeng sa nayrleniting  
mz nzbqkr nzulr nyr.

<sup>13</sup> A' trnayc-zlwzu mz drtwrgu da lc. Murde  
obqtipxku nzatutrkr Gct nzesalz-krde mz nzwz-  
krde bongavz x nrlc kxnzmrnang, kx nangi  
mrnyz kxnztubqng. ☆

<sup>14</sup> Mz nzmu-krde lcde, kx mzlengeng x inwen-  
geng, mzli ka tqaenzli-ngrnamu Mzli Kxmatq  
lc, navz zvz nzmnc-zpwx-krbzmu mz Gct mz  
nzmncngr kx tr x tubq mz nzobq-krde.

<sup>15</sup> Nadcpz mz drtwrmu kx nyzylu-krmlc asa  
murde leplz nakqlu kx narlapxng, da kc tqwai  
nzpi-krbz mzlegu Pol le bamu, vzpxm mz nzyr-  
plapxng kc tqkabz Gct bade.

<sup>16</sup> Pol ycmnetr-ngrde da lcng mz letz scdeng  
amrlx. X krlzx kx kzdung nzalvztr-krdeng  
rbxlz nzyrplatitrkr nar leplz le. X leplz kcng  
trnzrklz-zpwxung x kxnznrgong mz nzrlxngiti-  
krdr, leplz lcng nzalvztr-rbrng mz nzalvztrngr  
kxrbxlz lcng. X nzalvztr-rbr-kzng mz Nzryrn-  
grkxtr amrlx. A' da lc sa naodatingr nidr.

<sup>17</sup> Mzlengeng x inwengeng, krlzpeamu da lcng.  
Mz nzmu-krde lcde, aclvetio-angidramu, murde  
leplz kxdrka'-ngrng ma tzmailz-rbrlr nimu x sc  
trtu-amqngipewamuu mz nzrlxngiti-krmu.

<sup>18</sup> A' navz zvz nzmnc-aepztr-krbzmu mz Kx-  
etu Mevalu rgu Jisz Kxnzmcpz. X narlr-zvz-  
ngrbzmu nzokatr-krde nimu mz zmrlz ngrde  
kxmyalz. Naglqlzku nide mzli ka tqvzpe tqvzpe.  
Eu, angida.

Delape. Ninge *Pita*.

---

☆ **3:13** Asaea 65:17; 66:22

**Nzryrngrkxtr Kc Ate Rut x Sam**  
**The New Testament plus Ruth and Psalms is the**  
**Natügu language of the Solomon Islands**  
**Buk Baibel long langguis Natqgu**

copyright © 2008 Wycliffe Bible Translators, Inc.

Language: Natqgu (Natügu)

Translation by: SITAG

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2017-11-17

---

PDF generated using Haiola and XeLaTeX on 28 Dec 2024 from source files dated 31 Aug 2023

fb2b7f06-e254-5fb7-b59d-ee21d5d7a93f